

Filipoo nenacaauru rai

Faborohacha letoai

**Caresero cuhane neein Filipoo
nenacaauru Cana Coaunera coitucuurera
rai laenaa Faborone**

1 ¹Canuna Faboro neeun. Timoteeo ainane Cana Coaunera Calaohi Jesocurisito cachaneein nihacaanu. Satiin nii Filipoo neiniquichene Cana Coaunera Calaohi Jesocurisito esenetaeraauru raina caa laenain letoacaanu. Saain nii inara beraihurera ichauhe-naauru, chaen nechui nii inara coroatajaneraauru- diaconooru, naaonjoainuri rai reein tiaaina caa letoacaanu.

²Raotojoeen neeichene coina, inara belaa inara coroatajaneene Cana Inaca Cana Coaunera, Cana Curuaanaa Jesocurisito, naaonjoain.

**Cana Coaunera Ere esenetaeraauru rai
Cana Coaunera bajaa Faborone**

³Inara coaaucaauenne naineeine, “Nariha” naaun Cana Coaunera rai inara coreniha. ⁴Cana Coaunera bajaanunena, rachoojoeen bajaan inara rai, inara coroatajanihane coina, ⁵nunuhe caje coaauennein, Cana Coaunera Calaohi Jesocurisito Ere que cacha relaacache jiniiquiin ena netojoeina jaun. ⁶Rauhijiriina coitucuun, inara suujua rucujuein coriha Cana Coaunerana jaunte, jericha-

nejeein rucuhejeein sacureein, enacoau-neein turuha rai Calaohi Jesocurisito nereein tiaan. ⁷Cacoichana aina cutaain satiin inara belaihanuna jaunte ne carai rauhi, nitohaneein inara que coaucaauenne coina. Caresero cuhane nihanune janate, cacoelaain cacorataane Cana Coaunera. Chaen techu nii choae tacaain, cocoainanacaaihuri acatiha tein cacorataane, esinae rauhijiriin jianacoo cana mitaera neein niha Cana Coaunera Calaohi Jesocurisitone que irihanune coina. Nii cacoratanihane rijijieein inara coroatajanerichaa in Cana Coaunerane coitucuhana.

⁸Esinae Cana Coaunerate coaraje, inara belaa inara jeriha Cana Coaunera Calaohi Jesocurisitone rijijieeina jataain inara belaihun.

⁹Jeelai amuritoheriin Cana Coaunera Ere coitucuhin, Cana Coaunera Calaohi Jesocurisito jereein, ¹⁰nii que inara suujua coarain, inara suujua coitucuhichene coinana Cana Coaunera bajaaun inara rai. Nitohaneein neeichenete nenereen inara que cha, coateen turuha Jesocurisitone bana. ¹¹Nitohanihanete inara coroatajanereen Cana Coaunera Calaohi Jesocurisito, raotojoeen jiniiquiin ita coroatajaneen leeochoaauru aina ita belaa in neeichene coina. Nitohaneein neeichenete,

caohatiin inara coroatajaniha Cana Coaunerane aina cuaain rai caohacha ichaquichene coaraain, nii coreniha Cana Coaunera coroaeca cuurureein cachaauru.

“Chanu nihei ohanune, jerichanetoheca carai,” naa Faborone

¹²Aonacuchena inara rai erete aonaquiche. Caresero cuhanete niqui caenoaain, cacairichaaure niqui. Nenacaen tejian carausiaaeca catohaneein caetecure, nenacaen jeelai amuritoheriin Cana Coaunera Calaoi Jesocurisito Ere beebejihanu cau nenacauru raine coina. ¹³Nii jaunte Jesocurisito ere tonoracaanne coreniha, caa caseteco neein nihanune coitucure saain Roma curuaanaa rai soondarooru, saain cau nenacauru, naaonjoainunru. ¹⁴Nitohaneein caseteco neein nihanune coitucuruhanane jaunte, nii que nelararajiaain laraajiin nihei chaque casiirilanaala Cana Coaunera Ere beebejeeure cana nejeraauru Cana Coaunera coitucuurera cachaauru.

¹⁵⁻¹⁶Tabaaurute caichoe ininaa coacuhin Jesocurisito ere beebejeeure. Leeochaaurute laen esinae rauhijiriin, suujua coaraain Jesocurisito ere beebejeeure cacoelaain cacorataanena jerena caun, laraajiin Jesocurisito ere beebejihanune coreniha cau caseteco neein nihanune coitucuruhanane jaun. ¹⁷Nii caichoe ininaa coaauraurute, suujua coaraelanaala Jesocurisito ere beebejeeure, cacairichanaa jerena caaun niqui. ¹⁸Chanu nihei caohatoha nitohanai caraina jaun. Joaenreein cacha Jesocurisito Ere beebejihanena nenacaen rachoojoein nereeeunni.

¹⁹Nitohanihana jaunna carai Cana Coaunera bajaebajaequichene coreniha cacorataanerihani Jesocurisito suujuene coreniha, raotojoein jianacoo miturichaaunine coitucun.

²⁰Nii jaunna chunei que necoejela-naala nihanune jereeeun. Jerichanejeein cuaajeein nenacaen nauruta naurutaain Jesocurisito rijijieein nihanunena jereeeun. Chanu nihei ohanune jerichanetoheca carai.

²¹Ichaaojihanunena jataain Jesocurisito ere tonoraera neein niha cureeeunni. Jana ohanunena jian nenacaen raotojoein aina nereeeunni. ²²Jana ainihanena carijieein atiin ichaaojoein sacuhanunena, cana Curuaanaa Jesocurisito tenojohin amihanenaa ichana nainereeeunni. Chariji teeinti carai caohachare. ²³Tabaquena ohanune luhecaun, Cana Coaunera Calaoi Jesocurisito aina niha cuhanune coina. Niite laen jataain carai caohachare.

²⁴Nete laen inara caohachanu que caohachae carijieein ichaaojoein sacuhanune. ²⁵Aihana jaunna jaiti ichaojoeereunni, inara coroatajani-chaaunne Jesocurisito ere esenetaain, tonoraain raotojoein rachoojoein jeelai amuritoheriin neeichene coina.

²⁶Nitohanihana jaunna coaiteen enacoauneein inara aina nereeeunni. Nii banate raotojoein Cana Coaunera Calaoi Jesocurisito coroejeriquicheein, caohatiin cana belaihana jaun.

²⁷Atiin coujurihu Jesocurisito coitucuera neein nena tocohaneein, inara suujua coaraain inara ichao que ichaaoche. Inara coaraana uhene rijitojoeun niqui, nechaainti nainerichaaunni. Jana inara coaraa uhenihanune nihanatiin, jiniiquiin laraajiin Jesocurisito ere tonoraain neeuche atiin. Nii inara aina nejertenacauru coasijirilanaala raotojoein neeuche atiin.

²⁸Nitohaneein neeichenete chaque casineeichene coaracuruha inara aina nejertenacaurune, raajjenihane Moconajaera rene taca cuururichaine

coitucuha cuurureein. Nitohaneein coitucuhinte esinae rauhijiriin Cana Coaunera coreniha jianacoo neechene coitucuha cuurureein, que acaauru notaarichaa in Cana Coaunerana jaun.

²⁹Coatiha raujiaain esenetaaichene coinaacha jianacoo inara mitaai Jesocurisito. Coreniha necairichanaane maajein abaantaain neechene cointate jianacoo inara mitae.

³⁰Ita rijitoejeinte necairichanaa abaantaain laraajihacache. Inarate necairichanaa abaantaanulu laraajiine coaraquichelu. Nii rijijieeine chu nii inara rai beeuruhane tocohanein laraajiin enanetoejein necairichanaa abaantaain neeun.

Suujua coaraa Jesocurisitone rijijieein inara suujua coaraain neeuche.

2 ¹Inaderaaichene nihanatiin inara belaa in, inara coroatajanein, inara suujua laraajiaain, naaonjoan Jesocurisito suujuena jaun, ²ita belain raotojoein jiniquii neeuche, coujurihu Jesocurisito ere tonoraera neein nena tocohanein. Aihuna inara coaracaaunne, raotojoein rachoojeein ne.

³Coa leeochoaauru choae ininaa coacuhin, leeochoaauru que necohasitanaa coacuhin nihache. “Acaaurute jian cana amuritoherihure,” naaiche neechate caohachae.

⁴Coa inara caohacha nuhacha que coacuhin inaraacha ichai ichaain nihache. Leeochaauru rai netonai caohachanu quene maajein neleneneni coacuhin ichaain neeuche.

⁵Charijieein teeinti suujua coarae Cana Coaunera Calaoi Jesocurisito. Nii rijijieein inara suujua coaraain neeuche.

⁶⁻⁷Jerichanejein Cana Coaunera rijijieein niha natiinte, Cana Coaunera letono neein cacha neein nejanoaa

natiinte, “Naaonjoaina Cana Coaunera rijijieein neeun,” naain erenelu.

⁸Nitohaneeinte nejanoaain ichauhena neein letoaa Cana Coaunerana jaun, nere tonoraain leeocho ataibinae necojenaachara rijijieein coroso que ohe, Cana Coaunera rijijieein nihanaatiin.

⁹Nii jaunte satiin leeocho cocoainanacaihuri choae jauhecotojoeriin Jesocurisito cocoainae Cana Coaunera, ¹⁰jataain cocoainanacai neein nihane coitucuhin, nere tonoraauruha saain dedeeu nenacaauru, caa chauratane que nenacaauru, saain cana asae nenacaauru, naaonjoaihunri nihanatiin nere tonoraauruhane cointa. ¹¹Jataain acaauru curuaanaanu que Jesocurisito tiha Cana Inaca Cana Coaunerane coitucuhin, “Iite Cana Curuaanaa neei, nitohanein jeriha Cana Coaunerana jaun,” naain ereeuruha saain caa chauratane que nenacaurune cointate satiin leeocho cocoainanacaihuri choae jauhecotojoeriin Jesocurisito cocoainae Cana Coaunera.

Chauratane que nenacaauru rai cono rijijieein neeuruha Cana Coaunera esenetaaurerane

¹²Aihana jaun, caa ena inara caje coriaae inara caje nihanune jaun, inara aina nihanune bana quere tonorarae-tohichene amuritoheriin quere tonoraauche. Inara suujua coaraain, raotojein Jesocurisito ere tonoraain neeuche atiin, inara casetecaa Cana Coaunerane coataa. ¹³Inara coroatajane-richaain Cana Coaunera, inara suujua coaraain nere tonoraain niicha jerei ichaquichene cointa.

¹⁴⁻¹⁵Chatohanai ahihanenaa que inara letoaera nihane, nii inara letoaera que chaque ere lanaala raotojoein ichacuche, nabana baaso chaquichene

inara necoejchanuha chuneine coataa. Nechu aansai ataibinae cachaauru quete laurijiraquiin neeiche. Aihana jaun coa nohaneein, cacha coritaain, asijiauhin, naosateein, naaonjoaain nihache, Cana Coaunera Calahineein neeichene jaun.

Aihute neneeine inara que tonaain baasoneein chaque erei. Cana Coaunera Ere tonoraachene corenihate jianacoo osa que lanaala neeichene coitucuha cuurureein nii inara curuhacaain nenacaauru, Cana Coaunera coitucuruhi cachaauru.

¹⁶Nitohaneinte coitucuha cuurureein, ichaonaa tera Cana Coaunera ere que ereeiche acaauru raine.

Nitohaneein neeichenena raotojoeiin nereeunni, coaiten enacooaunein cau turuha Jesocurisitone, inacojoeiin laraajiin inara relaenihanune coitucurichaaunine jaun.

¹⁷Chanu nihei coaraain casohin cajaanruha Cana Coaunera Ere bihanu inara raine coreniha ne. Nenacaenna jian raotojoeiin nereeunni ohanune nihanatiin, atiin Cana Coaunera Calaoi Jesocurisito ere tonoraa curiquicheena jaun.

¹⁸Nitohaneein raotojoeiin nihanune jaun, carijitojoeiin caniha raotojoeiin neeuche inara netonai.

Timoteeo letoanaa jeriha Faboro ne

¹⁹Jerih Jesocurisito nena, enanecoojoa Timoteeo letoaaene rijitojoeun, inara coaraa uhane coina, inara coaraain chunocoha que carai beratihane raotojoeiin nihanune coina.

²⁰Coatiha nihei nii Timoteeo rijijieein coaaucaanne rijijieein inara caohachanu que coacuhin nei. ²¹Cana Coaunera Calaoi Jesocurisitohacha jerei ichana amuritoheriin acaauruhacha ichana jereeicha que coaacuruha saain nii leeochoauruna jaun. ²²Nii coitucuhichene tocha-

neeinte caohatiin cacorataane Cana Coaunera Ere beenaa que nii Timoteeo, Fojiara coroatajaniha rai calaohine rijijieeinte cacorataane.

²³Cha teeinti ichacurureein caniha cocoainanacaihuri. Inae nii coitucuhununa letoaaene rijitojoeun, inara coaraa uhane coina niqui. ²⁴Jerih Cana Curuaanaanena, canu netonai inara coaraa ureeunni enanecoojoa.

²⁵Carate caohachare nii cacorataane-raannu que inaraacha letoailu cana nejera Efaforoto letoaanu ichoaichanihane. Acate laraajiin cacorataane camijianeoo que. ²⁶Cunaitihane coitucuhichena jaunte, nii que suujua rohecaeriin nihana jaun jataain inara coana jere. ²⁷Esinaete chuhisi rauhijiriin banejelanaala ninauhene neein cunaitelu niqui. Nete cairichaaoojaain coaraana jaun rautae Cana Coaunera. Coatiha leinjiin acaacha cairichaaoojaain coaraai Cana Coaunera, canu netonai nihanatiin techu cairichaaoojaain coaraana jaun rautae Cana Coaunera, ohane ena amuritoheriin jataain inaderaain nihanune coataa.

²⁸Nii jaunna letoanaa jereeun, luhecotariin turuhin inara coaraa uhane coina. Inara netonai coaiten coaraain raotojoeiin rachoojoeiin neeichene coina. Nitoanihanena canuhetonai raotojoeiin niha cureeunni. ²⁹Inara coaraa uhane, corojeein belaaan raauche, coujurihu Cana Curuaanaa Jesocurisito coreniha ita nejera neein nena tochaneein. Jerichanejin chu rijijieein nenacaauru belaihuhe. ³⁰Basijijin lanajeje Jesocurisito jerenohin ichaane coreniha oha ne. Inara raajenihane canu coroatajanenaine neeichene janate, lunaa nitohanai ichana saijieein acaacha canu coroatajanelu.

**Ena nenea Cana Coaunera Ere
rauhi que acaauru relaa Faboro ne**

3 ¹Cana Curuaanaa Jesocurisito coitucuera neein neeichene jaun raotojoein rachoojoein neeuchera chasocuru. Jauriaana inara rai laenasihunlu niqui. Nena jerichanejeein coaiteen enacoaaneen caa laenaain letoareunni, raotojoein coitucuhin neeichene coina.

²⁻³Coaracuche, “Esinæ rauhijiriin Cana Coaunera Ere tonorana jeriquichene, inara jaberoco cari sauhichenete neere,” naain inara coritaa nii nechu aansai, jaberoco cari saaurerane coataa. Nitoaneeinte niqui cojunacaacooa nitohanaine coina cacha relaelu Moisesa inoalenlu niqui. Nete inae cau chauratane que turuha Jesocurisitone jaun, inae nene nitohanai, inae Jesocurisito Suujue que cana suujua cojunacatiha Cana Coaunerana jaun.

⁴Canuhetonaina Israeli nefoerate esine neein- Moisesa aitoonjoan tonoraera neein neeunlu jauriaa itolere amuritoheriin. ⁵Inae fosa janoniha nejanoanune janate, cajabereon cari jiununuhin moloorelu, Israeli esine nichaaun- Israeli niha canu inacane jaun. Canuna Beenjamiin lauri caje nefoeratenaa neeun. Ebereeo ere quete ereeure cafojiaraauru, jerichanejeeina chu acaauru rijijieein Ebereeo ere que ereeun. Canuna fariseeo neein Moisesa aitoonjoan rijijieein ichaera neein neeunlu. ⁶Casuujua coarihei amuneeinne Cana Coaunera Calaoihi Jesocurisito ere tonoraaurera cairichae-riin nerejetoonlu. Jataainna rauhijiriin Moisesa aitoonjoan rijijieein icharaae-toonlu.

Nii jaunte caque chaque erenaa nainenelu chunei.

⁷Nitohaneeinte carai nelateenneein nelu carai nii Moisesa aitoonjoan niqui. Nena inae canu ichao coriha Jesocurisitona jaun, inae enene jianeun, inae nelateniha caraine jaun.

⁸Nitohaneeinte inae Cana Coaunera Calaoihi Jesocurisito coitucuhane jaun, carai inae nelatene, nii jauriaa carai nelatei. Cana Coaunera Calaoihi Jesocurisito ere tonoraanuna jaunna jitariin nii itajeeun. Coatiha canu rai chaque nelatejeehai nii jitariin canuhacha itajei, inae que jaolecohane jaun. Cana Curuaanaa Jesocurisito coitucuhin ⁹aina nihanune coreniha inae chaque nelatihei nii jauriaanejeein nenea. Coatiha nii Moisesaacha aitoonjoan tonoraanune coreniha jianacoo caeterihei Cana Coaunera. Jesocurisito esenetaanune corenihate, jianacoo caete Cana Coaunera.

¹⁰⁻¹¹Aihana jaunna Cana Coaunera Calaoihi Jesocurisito suujua que suujuaquiin nihanune jereun. Acaihanejin nitohaneen nihanunena coacuun. Charijiein teeinti necairichanaa abaantaain ohane caje ichanaain nelu Cana Coaunera Calaoihi Jesocurisito. Nii rijijieeina canuhetonai nenea jereun.

**Itolere jianeinna satono que turuhane
reentiaain laraajiin nereeeunni.**

¹²Coatiha, “Inae esinae rauhijiriin aca jerihane rijijieein nihanu,” naain irihanune jaun aitoahaaun. Nena laen Aca jerihane rijijieein sacureeunni, caa baiha rijijieein nihanune coina.

¹³Coatiha, “Rijijieinna inae neun,” naanune caun aitoahaaun. Itolere canuhacha icharaaetilu jianeinna jelai choae jauhecotojoeriin laraajiin nereeeunni satono que tiaain, ¹⁴Jesocurisito aina cuaain cana rai niicha teeni tihane coina cana raain nihalu Cana Coaunerane jaan raanune coina.

¹⁵Caitono tocohaneein coaaucaache-nete ne, esinae rauhijiriin cana suujua coitucuhin, Jesocurisito esenetaeraneen ijiin niha cana suujuane coina. Jana ainihanete, inara que nii coaratereen Cana Coaunera, inara netonai nii coaraain coitucuichene coina. ¹⁶Nete laen inae nii coitucuujiacachene rijijieen tonoraain ichaohacachene caohachae.

¹⁷Chasocuru charijieen teinti cha ichaain neeun, nii rijijieen inara netonai cha ichaain neeuche. Chaen nii aihacaanune rijijieen nenacaauruhacha ichai rijijieen cha ichaain neeuche inara netonai.

¹⁸Inae araai saain aitocooaun. Niite jataen canu inaderajae. Atiinne coaiten aitoreeunni. “Cana Coaunera coitucuhanu,” naainte niqui ere cacha tabaauro, nete satiin coreniha coroso que ohin nihalu Jesocurisitone saijieen aina nejeratenaa tocohaneein ichaaore, joanreein necairichanaa abaantanaa nainecurenihane jaun.

¹⁹Nitohaneein ichaonacaaurute nitajiha cuurureein, necoejena charaneein ataibinae rijijieen ichaaoruhana jaun. Cana Coaunera coacuelanaala, acaihanejein caa chauratane que nenacaauro itolereeicha que coaucuruhane jaun. ²⁰Nitohaneein nihaacache laen cana. Dede curuaanaa neen niha cana Curuaanaa Jesocurisitona jaunte, dede cocoaicha neen nihacache. Aihana jaunte enacoaunein dede caje fauha uha nii jianacoo cana mitaera Jesocurisitone cohajihacache. ²¹Acate cana jaberoco coriha cureein culocohin rai jaberoco tocohaneein necaohacha que necaohachaaain. Itolere amuritona nainihane jaan aina cuaainte nitohaneein ichareein.

Raotojoein inetono janonaa bana rachoojoein neeuche

4 ¹Nitohaneein rauhijiriin Cana Curuaanaa ere tonorauchera cacoelaichaauro chasocuru. Jatainna inara coana jeretoon. Inara ainana raotojoein rachoojoein neeun, quesenetaaichene coreniha Cana Curuaanaa coitucuhichene jaun. ²Aonacuchena inara rai aitete, acaauru rai aitocoiche. Ita aina obaejerihuruhane jianeeincha, jiniiquii ita belaijeeincha neeuruhine, nii Ebodia, Siintique, enecuru, naaonjoaihunri coujurihu Cana Coaunera coreniha cana nejera neen nena tocohaneein.

³Nii Filipoo nihanune bana saain Culemente, leeochoauro, naaonjoain aina cajiniichaa inachaonaa tera erenaa que amihaneeuruhallune jaun. Acauro curuaate inae laenanohineen ne ichaonaa tera- Cana Coaunera Quirichacuhane.

⁴Raotojoein inetono janonaa bana rachoojoein neeuche, Cana Curuaanaa Jesocurisito aina neeichene jaun. Aonacuchena coaiten inara rai aite. Raotojoein rachoojoein neeuche.

⁵Aihute esinae rauhijiriin inara amute cacha belaina inaera cachaneein neeichene coaraain inara coitucuurumiin saain cachaauro itolere bana. Inae cataainjia turuha Cana Curuaanaane.

⁶Jiaonriha aansijiin laaojori coreniha nererojoecaaiche ne. Niha inara que chatohanane Cana Coaunera coraajeein bajaain, rai beechete coitucuhine.

⁷Nitohaneein ichaquichenete, inara suujua rachoojiaa cureein Cana Coaunera, raotojoein neeichene coina.

Nitohaneeinte itolere chaaauruhacha coitucunojoi amurijiriin raotojoein ichaonaanaja tereen inara rai Cana Coaunera. Nii Cana Coaunera tenojoin

cana suujua rachoojiaerate inara suujue suujuatereein Jesocurisito aina jiniiquin neeichene coina.

Coa cajihaneein inara suujua coaracache

⁸Satononejeeinne ena cuhane ichai caa que erereeeunni. Coa cajihaneein inara suujua coaracache. Acaihanejein rauhi cuhane cuaain cana suujuatera erenaa que inara suujua ereein nii que coaauucuche. “Leeochaauru belaaín, caohatiin leochaauru coaraain, caohatiin camijianeeneonne maajeein ichaain, naaonjoain nihanunete caohachae,” naain inara suujua tocharaain inara suujua coaracuche.

⁹Nii inara relaanulune jana aonaain esenetaaichelune tocohaneein neeuche. Charijieein teeinti cuu nihanune bana quichao que ichaorejetoón, nii rijijieein inara netonai caohachaaín inara ichao que ichaooche. Nitohaneein neeichene, inara aina niha cureein cana suujua rucuhara Cana Coaunera, raotojoein neeichene coina.

Cairicheineein nihanune nihanatiina jerichanejein raotojoein nereeeunni.

¹⁰⁻¹¹Tabiicha carajaain cacoaauquichene jaunna, Cana Curuaanaa coroejeeun. Naaonjoaainte, “Cacoaau-curenera,” coatiha naa casuujuane caaun caitono nihei, neniha chuni letoaichene jaannune jaun, cacoelaaichene jaannu coriqui letoaneeneichene coitucuhanune jaun. Coatiha inara caje chaaelai bajaa caitono nihei. Cairicheineein nihanune nihanatiina jerichanejein raotojoein nereeeunni. Inae nitohaneein nerelaain nihanune jaun. ¹²Aihanune banana necairichanaa coaraain neeun. Ai banana, chaque latijiojoi lanaala neeun. Nii jaunna itolere necairichanaa, mijitena, naaonjoaain ichaonaa que ichaonaa

coitucuhin neeun. Inae nitohanei coriaanune jaunna, neniha chaaelai caraine nihanatiin chaque tonajelanaala neeun. ¹³Jatoroaaína neeun, chatoha-neein caetera nihane abaantaain nihanune coina. Nitohaneeinna joaenreein abaantana naineeun, casuujua lararajiaa cacorataaniha Cana Coaunera Calaohi Jesocurisitona jaun. ¹⁴Chaen caohachate ichaquiche, necairi-chaaceaaunne jana canu rai coriqui letoaaín.

¹⁵Coaauquiche chachu inara netonai natiin, taolu inara ratiriin Masedoniau cuhanune bana techu, inara Filipoo Jesocurisito ranojoneein neiniquichene coaiten carai coriqui letoaaichelu. Acaihanejein inaraachete Jesocurisito que cacha relaanune nunuhetihanune caje coauneein cacorataanera neein neeiche, Cana Coaunera Calaohi Jesocurisito que inara relaanune cainaera rijijieein. ¹⁶Atiin Tesalonecau nihanune jana techu, coroata sai cuhane coaiten le cachaauru cachaauru caje coriqui taojiajeein carai letoaaichelu.

¹⁷Coatiha cacorataaneichene coina caitono nihei. Nitohaneein cacorataaneichene corenihate jeelai choae jauhecotojoeriin nii cainaa cureein Cana Coaunera dedeeu.

¹⁸Ena cuhanena raau latichaaunne amuritoheriín Efaforoto aina inaraacha letoai que jojohin. Nitohaneein inara suujua caje coauneein ichaquiche Cana Coaunera notaracaena jaunte, nii coaraain rachoojoe Cana Coaunera, nitohaneein ichaera cacha rautaana jaun. ¹⁹Nii jaunte chaelai lateein neeichene inara rai ecotiha cureein Cana Coaunera, Jesocurisito ere tonoraera neeichene jaun. Acaachate Cana Coauneranein nihana jaun nitohanai ichana naine.

²⁰Aihana jaun coanete Cana Inaca Cana Coaunera coroejeein nihacache

inoaenlunetiin. Nii rijijieein neeine
atiin.

**“Inara coaauca jera Faboro,”
naain beeuche.**

²¹Satiin nii cuu nenacaauru
Jesocurisito coitucuurerera rai, “Inara
coaauca jera Faboro,” naain
beeuche. Cau caniha Cana Coaunera
Calaohi coitucuurerate chu inara

coaaucure. ²²Romanocuru
curuaanaa loreri asaae nenacaauru
netonai techu inara coaaucure,
saain cau nenacaauru Cana
Coaunera coitucuurerera netonai
techu inara coaaucure.

²³Inara suujua laraajiaain, inara
coroatajaneene Cana Curuaanaa
Jesocurisito.

Inae jianichaaun.